

ПОСЛЕДОВАНИЕ ПОЛУНОЩНИЦЫ

ПОЛУНОЩНИЦА ВОСКРЕСНАЯ

Иерей, глаголет: Благословен Бог наш:

И мы глаголем: Аминь. Слава Тебе, Боже наш, слава Тебе. Царю небесный: *Трисвятое*. Пресвятая Троице: Отче наш:

Иерей: Яко Твое есть Царство: *Мы же:* Аминь: *Таже:* Господи, помилуй (12). *Слава, и ныне:* Приидите, поклонимся: *трижды*.

Псалом 50

Помилуй мя, Боже, по велицей милости Твоей, и по множеству щедрот Твоих, очисти беззаконие мое. Наипаче омой мя от беззакония моего, и от греха моего очисти мя. Яко беззаконие мое аз знаю, и грех мой предо мною есть выну. Тебе единому согреших и лукавое пред Тобою сотворих: яко да оправдишися во словесех Твоих и победиши внегда судити ти. Се бо в беззакониих зачат есмь и во гресех роди мя мати моя. Се бо истину возлюбил еси, безвестная и тайная премудрости Твоя явил ми еси. Окропиши мя иссопом и очищуся; омыеши мя, и паче снега убелюся. Слуху моему даси радость и веселие: и возрадуются кости смиренные. Отврати лице Твое от грех моих, и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица Твоего, и Духа Твоего Святаго не отыми от мене. Воздаждь ми радость спасения Твоего, и Духом владычным утверди мя. Научу беззаконныя путем Твоим, и нечестивии к Тебе обратятся. Избави мя от кровей, Боже, Боже спасения моего, возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо: всесожжения не благоволиши. Жертва Богу – дух сокрушен: сердце сокрушенно и смиренно Бог не уничижит. Ублажи, Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожигаемая: тогда возложат на олтарь Твой тельцы.

И абие глаголем канон Пресвятей и Живоначальней Троице

Канон троичный шестаго гласа

Песнь 1

Ирмос: Яко по суху пешешествовав Израиль, по бездне стопами, гонителя Фараона вида потопляема, Богу победную песнь поим, вопияше.

Прпев: Пресвятая Троице, Боже наш, слава Тебе.

Три ипостаси поем богочначальны, единственнаго естества, неизменный зрак, благаго человеколюбца Бога, прегрешений очищение нам дарующа.

Пресущный едине, и трисиянный начертаньми, Господи, в божестве едином сый, вразуми нас, и сподоби Твоего божественнаго сияния.

Слава: Невестоукрасив Павел, юже от язык церковь, единому Тебе триипостасному Богу поклоняться научи, от негоже, и имже, и в немже вся быша.

И ныне, богородичен: Из чрева твоего пройде умное, Богородице, солнце, и осия нас трисветлаго божества зарями, егоже поюще благочестно тя ублажаем.

Песнь 3

Ирмос: Несть свят, якоже Ты, Господи Боже мой, вознесый рог верных Твоих, блаже, и утвердивый нас на камени исповедания Твоего.

Украсив, трисветлый Боже, чины небесныя, устроил еси пети Тя трисвятыми гласы: с нимиже приими и нас, воспевающих Твою благодать.

Едино непреложное троичное, сообразное единственное богоначалие поюще, молим Тя тепле, грехов многих низпослати ныне нам прощение.

Слава: Уме безначальный Отче, сообразный божий Слове, и Душе божественный, благий и правый, воспевающыя верно Твою державу соблюди, яко благоутробен.

И ныне, богородичен: Пажить потреби тли, человек по существу быв Бог мой во утробе твоей, чистая: и родоначальники прежняго осуждения един свободи.

Таже: Господи, помилуй (*трижды*).

Седален, глас 6. Подобен: Еже о нас:

Владыко Боже, призри с небесе, и виждь наше смирение яко щедр, и умилосердися, человеколюбче преблагий: ни откуда бо надеемся прощения получитьи злых, имже согрешихом, темже буди с нами и никтоже на ны.

Слава, и ныне, богородичен: Владычице чистая призри, Богородице, виждь наших язв болезни, и умилосердися, пречистая, и исцели совестное жжение, твою милостию орошающи, и вопиющи рабом твоим: аз есмь с вами, и никтоже на вы.

Песнь 4

Ирмос: Христос моя сила, Бог и Господь, честная Церковь боголепно поет взывающи, от смысла чиста о Господе празднующи.

Возвышай мысль, единице трисветлая, и душу и сердце Твоих певец скоро возведи, и сияния Твоего и светлости сподоби.

Претвори и преобрази от злобы мя всякия к добродетели, едина неизображенная и неизменная Троице, и Твоими зарями просвети.

Слава: Помыслив прежде, мудре составил еси ангелов чины, служительная Твоя благодати, триипостасная единице: с нимиже приими мою хвалу.

И ныне, богородичен: Иже естеством несозданный Бог присносущный созданное восприем человеческое естество, възобрази во святей твоей утробе, Богородице, приснодево.

Песнь 5

Ирмос: Божиим светом Твоим, блаже, утренюющих Ти души любовию озари, молюся Тя ведети, Слове божий, истиннаго Бога, от мрака греховнаго взывающа.

Помышляюще естество богоначальное, промыслительное и спасительное всех сущее, Владыко, трисветлое же едино, к Тебе утренюем, прощения просяще грехопадений.

Отче безначальный Боже, и соприисносущный Сыне, и Душе святыи, утверди единачальная Троице, Твоя певцы, и от всякия напасти избави и скорби.

Слава: Управляя сияньми богодетельными, и ко благоугождению Твоего триипостаснаго божества, солнце славы, наставляя мя присно, и божественнаго царствия сотвори причастника.

И ныне, богородичен: Иже вся носяи и соблюдаяи всесильною Твоею рукою, Слове божий неизменне, сохрани и соблюди Тя славящыя, молитвами рождшия Тя Богоматере.

Песнь 6

Ирмос: Житейское море, воздвигаемое зря напастей бурею, к тихому пристанищу Твоему притек вопию Ти: возведи от тли живот мой, многомилостиве.

Премудрость и разум, богоначалие трисветлое певцем Твоим даруй, и доброты лучами светоотдельныя Твояа благости осияватися всех сподоби. Дважды.

Слава: Свете нераздельный по существу, трисиянне, вседержительне, неприступне, сердца озари верно хвалящих державу Твою, и к божественной любви впери.

И ныне, богородичен: В тя вселися, приснодево, яве содержитель и Господь всех, и единому трисиянному зраку божества человеки поклонятися научи.

Господи, помилуй. *(Трижды)*

Седален, глас 6. Подобен: Еже о нас:

Отче и Сыне, со Духом святым, призри на ны, верую Тебе поклоняющыяся, и славящыя державу Твою, благоутробне, со огненными, брении, иного бо разве Тебе не вемы, и возопий поющым Тя: аз есмь с вами, и никтоже на вы.

Слава, и ныне, богородичен: Призри на ны, всепетая Богородице, возсияй просвещение сердцам омраченным, и озари стадо твое, пречистая: елико бо хощеша и можеша, яко мати сущи зиждителя твоего: и возопий молящым тя: аз есмь с вами, и никтоже на вы.

Песнь 7

Ирмос: Росодательну убо пещь содела ангел преподобным отроком: Халдеи же оплающее веление божие, мучителя увеща вопити: благословен еси, Боже отец наших.

Крепкую мне мысль устрой, трисветлая начертаньми еденице, еже хранити и соблюдати божественныя заповеди Твоя, и внегда пети Тебе верно: благословен еси, Боже отец наших.

Яко тождеством естества поемый, неизреченное единственный Боже, лица же Троицы нося число, соблюди всех нас от различных искушений и обстояний.

Слава: Соестественна и соприисносущна славим, единаго Тя по существу Бога, свойства неслиянне ипостасными Троице, различное просто предлагающе, во зраце непрременнем яве.

И ныне, богородичен: Бог пресущный прият, пречистая, от чрева твоего чистаго, ныне человеколюбезне сешение яве, и всех научи вопити: благословен еси, Боже отец наших.

Песнь 8

Ирмос: Из пламене преподобным росу источил еси, и праведнаго жертву водою попалил еси, вся бо твориши, Христе, токмо еже хотети: Тя превозносим во вся веки.

Очищение прегрешений скоро подаждь ми, и страстей многообразных избавление, сообразная Троице, единице триипостасная: да Тя славлю во вся веки.

Волитель милости известован, яко Бог милостив, всех помилуй, трисветлая единице и Троице преблагая, славословящих Твое величество.

Слава: От света присносушаго Отца, света соприсносушна рождшася Слова, со Духом исходным светом, верою славим, и превозносим во вся веки.

И ныне, богородичен: Врача человеком, пречистая, родила еси, всесильнаго Слова, Христа Господа, прародительная язвы всех исцеляюща, превозносящих его во веки.

Песнь 8

Ирмос: Бога человеком невозможно видети, на негоже не смеют чини ангельстии взирати, тобою бо, всечистая, явися человеком Слово воплощено: егоже величающе, с небесными вои тя ублажаем.

Зрети чинове херувимстии, Владыко, доброты Твоя слава не могуще, крылы покрывающесе, непрестанно троичную песнь вопиют, триипостасную Твоего богочаля единственнаго державу славяще.

Твоя сияния, солнце незаходимое, Твоих рабов подаждь сердцам: и просвети души, и избави от многих прегрешений, единае всемилостиве и триипостасне: и нетленные Твоя жизни нас сподоби.

Слава: Еже свет единочестный и трисолнечный, и светодельный, божество сущее, озари верою Тя поющих, и от мрачнаго избави злодейства, и сподоби светлейших Твоих селений, яко преблагий.

И ныне, богородичен: Премудре человека прежде созда сын твой, дево, и истлевшаго обнови тобою, всепетая: и божественнаго света зари невечерняя всех исполни, ты Богородицу истинную верою славящих.

Таже припеви сия:

Достойно есть яко воистинну, славити тя Бога Слова, егоже терпещут и трясутся херувими, и славословят силы небесныя, воскресшаго тридневно из гроба Христа жизнедавца, страхом прославим.

Воспоим вси боголепно песньми божественными, Отца, и Сына, и Духа божественнаго, триипостасную державу, едино царство и господство.

Юже поют вси земнороднии, и славословят силы небесныя, от всех верно покланяемую, единицу по существу триипостасную.

Господоначальную херувим, и богочальную без сравнения серафим, нераздельную Троицу во единице, сущее богочалие, Тя величаем.

Отцу безначальному и Богу, собезначальному Слову со Духом покланяюся, неразлучное едино соединяемое существо, тричисленную единицу песньми почтим.

Лучезарныя Твоя молния возсияй ми, Боже мой, триипостасне вседетелью, и дом мя покажи Твоя неприступныя славы, светел и светоносен и неизменен.

Егоже трепещут и трясутся херувими, и славословят ангельская воинства, от девы неизреченно воплощагося, Христа жизнедавца страхом прославим.

Таже: Трисвятое. Пресвятая Троице: Отче наш:

Ипакоу гласа. Господи, помилуй. (40)

Слава, и ныне: Честнейшую херувим, и славнейшую без сравнения серафим, без исления Бога Слова рождшую, сущую Богородицу тя величаем.

Именем Господним благослови, отче.

Иерей: Боже, ущедри ны, и благослови ны, просвети лице Твое на ны, и помилуй ны.

И молитва пресвятей Троице, творение Марка монаха

Всемогущая и животворящая святая Троице, и светоначальная, яже мирную всякую и премирную тварь, за едину благодать от несущих приведый, и промышляя и содержащи: иже по прочих Твоих о земном роде благодеяниих, и покаяние нам ради плотскаго неможения до смерти даровавый: не остави нас окаянных в лукавых наших деяниих умерети, ниже злоначальнику, и завистицу, и губителю посмешство быти: зриши бо, благосерде, елик убо онаго на нас навет и вражда: елико же и наше страствование, и слабость, и небрежение. Но неоскудныя Твоя благодати соделай на нас, молим на всякий день и час прогневающи Тя честных и животворных заповедей преступлением. И вся убо всего прешедшаго живота нашего и до нынешняго часа согрешенная нами, в деяниих, или глаголаниих, или в помышлениих, остави и прости. Сподоби же нас прочее скончати житие в покаянии, и умилении, и соблюдении святых Твоих повелений. Аще убо сладостию прельстившеся многообразне согрешихом, или мерзскими похотьми неполезными и вредными обольстившеся препроводихом: аще гневом и яростию подвигшеся безсловесною, коего брата нашего оскорбихом: аще языком неизбежных, и стропотных, и крепких сетей объяхомся: аще коим чувств наших, или всеми, волею, или неволею, ведуще, или неведуще, от восхищения, или поучения безумно поползохомся: аще же лукавыми помыслы и суетными совесть осквернихом: аще ли коим другим образом прегрешихом, от предприятия и обычая томими злаго, прости нам, и остави вся, всещедре, преблаже и многомилостиве: и даруй нам прочее бодрость и силу, во еже творити волю Твоюблагу, и благодарну и священну: да ношнаго и мрачнаго зла, световидным покаянием пременшеся, и яко во дни благообразно ходяще, и очищени объявимся человеколюбию Твоему, недостойнии, воспевающе Тя и величающе во веки, аминь.

И отпуст, и прощение обычное.

Таже иерей глаголет ектению:

Помолимся о господине нашем: *и прочая.*